

# ADYAYA I

## PURWAKA

### 1.1 Dadalan Pikobet

Peplajahan bahasa Bali inggih punika peplajahan muatan lokal sane kapolihang ring sekolah saking SD kantos SMA/SMK. Peplajahan bahasa Bali ngranjing ring peplajahan bahasa sane nenten sida lempas sajeroning kawagedan mabasa inggihannyane kawagedan ngwacen, kawagedan mirengang, kawagedan nyurat, miwah kawagedan mabaosan. Maosang indik kawagedan mabasa, silih tunggil saking petang kawagedan mabasa sane sarat mawiguna ring wewidangan paguron-guron inggih punika kawagedan nyurat. Manut Nurjamal dkk (sajeroning Fahiyah,(2016:156), nyurat inggih punika kawagedan mabasa sane kaanggen sajeroning ngamedalang unteng pikayunan, pangrasa lan papineh majeng ring jadma tiosan ring rupa sesuratan. Peplajahan nyurat sane prasida kapolihang ring sekolah sinalih tunggilnyane wenten peplajahan puisi Bali anyar (PBA).

PBA inggih punika sinalih tunggil peplajahan Basa Bali sane sampun lumrah kaicenin ring sekolah mawit saking SD kantos SMA/SMK. Nganutin kawentenan kurikulum anyar, inggihan kurikulum merdeka sane kaanggen ring SMA Negeri 3 Singaraja, sinalih tunggil soroh peplajahan nyurat sane kaajahin ring peplajahan basa Bali inggih punika nyurat PBA, manut tetujon peplajahan (TP) ring semester genap sane maosang ngenenin indik peplajahan PBA ring sekolah inggih punika *“Menulis sebuah puisi Bali modern dengan memperhatikan keindahan bahasa”*. Saking TP punika, kaaptiang mangda sisia prasida makarya karya sastra (*menghasilkan produk*) marupa PBA. Kawagedan nyurat PBA ring peplajahan

becik kaicenin, santukan maduwe kawigunan ngamedalang manah utawi pikayunan, nincapang kawagedan sisia ri sajeroning peplajahan nyurat lan prasida nincapang kosa basa sisia.

Kawentenan peplajahan nyurat PBA ring sekolah, inggihan ring kelas X C SMA Negeri 3 Singaraja pikolih sane kapolihang durung nincap utawi kirang mikolihang asil sane *maksimal* utawi durung nganutin KKTP inggih punika 76. Nilai sane kapolihang olih sisia sajeroning peplajahan nyurat PBA ngamolihang rata-rata 69,92. Pikolih punika prasida kapanggih saking kawagedan sisia sajeroning nyurat PBA, akeh sisia sane durung tatas nyurat PBA, sisia akehan nempe sesuratan PBA sawitranyane ring kelas miwah nempe pikolih ring *google*, sisia kari meweh nglimbakang maya cita, sisia durung sida nganggen palihan kruna lan basita paribasa sane manut nganutin unteng sane kakaryanin, puisi sane kakaryanin olih sisia durung nyinahang basa sane kaanggen padet taler kari akeh sisia nganggen basa campuhan (bahasa Indonesia lan basa Bali) ri sajeroning nyurat PBA sane ngawinang basa ring puisi sane kakaryanin punika nenten lengut. Kawentenan punika ngawinang sisia ri sajeroning nyurat PBA kari kirang, guru ngarasayang asil sane kapolihang olih sisia kelas X C SMA Negeri 3 Singaraja sajeroning nyurat PBA durung nganutin *kriteria ketercapaian tujuan* peplajahan (KKTP) inggih punika 76. Punika mawinan kelas X C SMA Negeri 3 Singaraja kadadosang jejerang tetilikan ring tetilikan sane jagi kalaksanayang.

Pikobet indik peplajahan nyurat PBA taler kapanggih ring kelas X C SMA Negeri 3 Singaraja, manut praktiasa sane sampun kamargiang sareng sinalih tunggil guru bahasa Bali ring SMA Negeri 3 Singaraja Ni Made Ayu Indra Wahyuni, S.Pd.B prasida kapolihang kawagedan sisia kelas X C indik peplajahan

nyurat PBA kabaos kirang, kawentenan punika kajantenang santukan *model* sane kaanggen olih guru ring peplajahan nyurat PBA durung nganggen *model* peplajahan sane *inovatif* saha anut kaanggen ri sajeroning peplajahan nyurat PBA, *model* peplajahan sane kaanggen kantun nganggen *model konvensional* sakadi nganggen *metode ceramah*, *metode ceramah* ngawinang sisia kirang *aktif* utawi kirang jemet sajeroning nyarengin peplajahan nyurat puisi, antuk punika *model* sakadi punika nenten anut kaanggen ri sajeroning peplajahan nyurat PBA minab nenten prasida nuntun sisia jemet nyarengin peplajahan (*aktif*) saha ngawinang sisia gelis med nyarengin peplajahan nyurat PBA. Manut Mustakim (2010), ngawigunayang *metode ceramah* ring peplajahan ngawinang sisia kirang *aktif* saha nenten ngicenin rasa ngaat malajah nyurat puisi majeng sisia, santukan guru akehan *berteori*. Antuk punika guru mangda waged (*selektif*) ri sajeroning ngrereh *model*, *teknik* utawi *strategi* sane kaanggen ngamargiang peplajahan ring kelas, mangda prasida numbuhan rasa seneng sisia sajeroning nyarengin peplajahan nyurat PBA. Punika dados pikobet sajeroning pamargi peplajahan ring kelas, sane ngawinang sisia kirang seneng malajah nyurat PBA santukan sajeroning ngrereh *model* peplajahan kantun kirang utawi kirang anut kaanggen sajeroning peplajahan nyurat PBA.

Pinaka jalaran kaanggen nepasin pikobet punika, guru mangda ngrereh *model* peplajahan sane patut anut ring kurikulum miwah kawentenan sisia sajeroning peplajahant nyurat PBA. Ring tetilikan puniki, pacang nganggen sinalih tunggil *model* peplajahan sane prasida nincapang kawagedan pikayunan sisia ri sajeroning muputang pikobet (*berpikir kritis*) inggih punika nganggen *model* peplajahan *Project Based Learning* (PjBL). Manut Goodman saha Stivers (2010) maosang

indik PjBL inggih punika *model* peplajahan sane kaanggen ring parikrama peplajahan sane sekala, sane ngicenin sisia pikobet sane mapaiketan ring kahuripan sadina-dina antuk kapuputang sajeroning masekaa utawi soang-soang diri nganutin *proyek* sane kakaryanin. *Model* PjBL kaanggen *model* peplajahan ring materi nyurat PBA, santukan *model* puniki *model* peplajahan sane marupa *proyek* sane anut kaanggen ring peplajahan nyurat PBA taler ngawinang sisia maduwe solah sane *mandiri, gotong royong, miwah kreatif* punika ngawinang ngawigunayang *model* PjBL prasida *mendukung* panglimbak parisolah sisi nganutin *profil pelajar pancasila*. Lianan saking punika, taler ngicenin sisia pamargi sane sekala utawi *nyata* ring pamargi peplajahan, ngawinang sisia *aktif miwah kreatif*, taler nincapang kaweruhan lan kawagedan sajeroning nyurat PBA ring sisia kelas X C SMA Negeri 3 Singaraja.

Tetilikan sane nganggen materi PBA boya ja tetilikan sane kapertama. Daweg sane sampun lintang wenten tetilikan sane nilikin materi PBA inggih punika tetilikan saking Wahyuni (2022) tetilikannyane mamurda “Sarana *Film Pendek Guru* Kaanggen Nincapang Kawagedan Nyurat PBA Ring Kelas X MIPA 1 SMA Negeri 2 Banjar”. Sane ngabinayang sareng tetilikan sane pacang kamargiang inggih punika *fokus* sareng *model* peplajahan taler jejering, miwah penandang tetilik. Peplajahan nyurat PBA prasida nincap yening nganggen *model* peplajahan sane *inovatif*. Prasida kacutetang yening tetilikan punika sareng tetilikan sane jagi kamargiang pateh nganggen materi PBA sane kaanggen sarana tetilikan. Taler kaweruhan sisia indik PBA prasida kalestariang miwah sayan nincap ring padewekan.

Kadasarin antuk makudang-kudang dadalan pikobet sane kapolihang ring ajeng, ring tetilikan puniki pacang kawigunayang *model* peplajahan PjBL sane prasida nincapang kawagedan nyurat PBA sisia kelas X C SMA Negeri 3 Singaraja. Punika mawinan murda ring tetilikan puniki “Nincapang Kawagedan Nyurat PBA antuk *Model Project Based Learning* ring Sisia Kelas X C SMA Negeri 3 Singaraja” tetilikan puniki kaaptiang mangda guru lan sisia prasida ngamargiang *model* peplajahan PjBL puniki ring sekolah, mangda sisia punika sayan waged malajah ring kelas utamanyane ring materi peplajahan nyurat PBA.

### **1.2 Ngrereh Pikobet**

Nganutin dadalan pikobet sane sampun katlatarang, ring sajeroning tetilikan puniki ngamolihang makudang-kudang pikobet sane sampun kapolihang, mangdane prasida mapaiketan sareng peplajahan nyurat PBA sane nganggen *model* peplajahan PjBL mangda prasida nincapang kawagedan sisia nyurat PBA. Pikobet sane kapanggih minakadi: 1) Sisia durung tatas ngaresepin peplajahan nyurat PBA, 2) Peplajahan nyurat PBA ring SMA Negeri 3 Singaraja durung ngamolihang pikolih sane *maksimal* utawi durung nincap, saha 3) Kirangnyane ngawigunayang *model* peplajahan *inovatif* sane prasida nuntun sisia malajah dados sisia sane jemet (*aktif*) ri sajeroning nyarengin peplajahan.

### **1.3 Ngwatesin Pikobet**

Ri sajeroning tetilikan sane jagi kalaksanayang, patut nureksain malih pikobet sane sampun kapolihang. Pikobet punika kawatesin antuk makudang-kudang parindikan minakadi kabanda antuk galah lan ngicenin pamargi majeng ring panilik siosan mangda nyangkepin saha ngamargiang tetilikan manut kaweruhaan widya sane lianan. Malarapan antuk punika, pikobet sane kawatesin inggih punika

pamargi peplajahan nyurat PBA nganggen *model Project Based Learning* ring sisia Kelas X C SMA Negeri 3 Singaraja.

#### 1.4 Bantang Pikobet

Malarapan antuk dadalan pikobet ring ajeng kapolihang batang pikobet ring tetilikan puniki, inggih punika:

1. Sapunapi pidabdab sane kamargiang guru sajeroning nglaksanayang peplajahan PBA nganggen *model Project Based Learning* ring sisia kelas X C SMA Negeri 3 Singaraja?
2. Napi ke *model Project Based Learning* prasida kaanggen nincapang kawagedan nyurat PBA ring sisia kelas X C SMA Negeri 3 Singaraja ?
3. Sapunapi panampen sisia ring kawentenan *model Project Based Learning* sane kaanggen nincapang kawagedan nyurat PBA sisia kelas X C SMA Negeri 3 Singaraja?

#### 1.5 Tetujon Tetilikan

Nganutin bantang pikobet sadurungnyane kapolihang tetujon tetilik sakadi puniki.

1. Mangda prasida mahbahang pidabdab sane kamargiang guru ngawigunayang *model Project Based Learning* kaangen nincapang kawagedan nyurat PBA ring Sisia kelas X C SMA Negeri 3 Singaraja.
2. Mangda nyantenang pikolih saking ngawigunayang *model Project Based Learning* prasida kaangen nincapang kawagedan nyurat PBA ring sisia kelas X C SMA Negeri 3 Singaraja.

3. Mangda prasida mahbahang indik penampen sisia ring kawentenan *model Project Based Learning* (PjBL) sane kaanggen nincapang kawagedan sisia nyurat PBA ring sisia kelas X C SMA Negeri 3 Singaraja.

## 1.6 Kawigunan Tetilikan

Ring tetilikan puniki maduwe kawigunan sane kakepah dados kalih inggih punika kawigunan pamucuk (*teoritis*) miwah kawigunan panglimbak (*praktis*). Kawigunan pamuncuk inggih punika kawigunan tetilikan majeng ring panglimbak widya, punika mawinan kawigunan pamuncuk puniki nglimbakang widya ring tetilikan saking soroh *teoritis*. Selanturnyane kawigunan panglimbak inggih punika kawigunan ring tetilikan sane mapaiketan sareng pikobet sane sampun kapolihang.

### 1.6.1 Kawigunan Pamuncuk (*teoritis*)

Tetilikan puniki kaaptiang mangda mawigunan ri sajeroning nincapang kawagedan nyurat PBA, utamanyane sajeroning panglimbak lan ngrereh *model* peplajahan sane sida ngabecikang kawagedan sisia ri sajeroning nyurat PBA. Pikolih tetilikan puniki kaaptiang mangda prasida mawiguna sajeroning panglimbak kaweruhan widya ring wewidangan paguron-guron indik tata cara nyurat puisi, utamanyane indik tata cara peplajahan ring kelas.

### 1.6.2 Kawigunan Panglimbak (*praktis*)

#### a. Majeng ring Sekolah

Majeng ring sekolah, kaaptiang mangda tetilikan puniki sida kadadosang dasar ri tatkala ngrereh *model* lan *strategi* peplajahan sane kaanggen nincapang kawagedan sisia sajeroning peplajahan nyurat PBA.

**b. Majeng ring Guru Basa Bali**

Tetilikan punika mangda prasida kawigunayang olih guru antuk nincapang kawagedan sisia ring peplajahan nyurat PBA nganggen *model* peplajahan *Project based Learning*. Malarapan antuk punika prasida kaaptiang mangda guru nganggen model peplajahan sane *inovatif* nganutin *kurikulum* sane anyar inggih punika kurikulum merdeka rikala ngajahin para sisianyane, utamanyane ri sajeroning ngajahin nyurat PBA.

**c. Majeng ring Sisia**

Sisia sane kadadosang antuk jejering tetilikan, kaaptiang mangda sisia X C SMA Negeri 3 Singaraja sida ngamolihang pamargi sekala indik peplajahan sane nyenengin lan *inovatif* antuk *Model Project Based Learning* prasida kaanggen nincapang kawagedan nyurat PBA ring sisia kelas X C SMA Negeri 3 Singaraja.

**d. Majeng ring panilik sane tiosan**

Sida kawigunayang antuk dasar sajeroning ngamargiang telitikan sane pateh lan telitikan sane tiosan. Taler dados kawigunayang antuk imba tatkala ngamargiang telitikan panglimbak peplajahan nyurat PBA nganggen *model* peplajahan.

